

開放文學－歷代筆記－夷堅丁志 卷第十五

譚李二醫缺 內文缺

黃谷取膽缺

內文缺

賈木惡夢缺

內文缺

夢龜告方

冀州士人徐蟠·因墜馬傷折手足·痛甚·命醫者治之·其方用一活龜·既得之矣·夜夢龜言曰·吾惟整痛不能整骨·有奇方奉告·幸勿相害也·蟠扣之·雲·取生地黃一斤·生薑四兩·搗研細·入糟一斤同炒勻·乘熱以布裹罨傷處·冷即易之·先能止痛·後整骨·大有神效·蟠用其法果驗·

田三姑

淄州人田穀女·嫁攸縣劉郎中之子·劉下世數年·田氏病·遣僕至衡山·招表姪張敏中·欲托以後事·未克往而田不起·初·田有兄娶衡山廖氏女·女死·又取其妹·兄亦亡·獨後嫂在·乃與敏中同往弔·寓於張故居沒山閣·時隆興甲申冬也·是夕·廖嫂暴心痛·醫療小愈·過夜半·欵起坐·語言不倫·張往省候·則其姊憑焉·咄咄責妹曰·何處無昏姻·必欲與我共一婿·死又不設位祀我·使我歲時無所依·非相率同歸不可·張諫曉之曰·此自田叔所為·非今婦過·既一家姊妹·寧忍如此·少頃·勿拱手曰·叔翁萬福·又曰·慶孫汝可上床坐·叔翁者·田三之季父穀·慶孫者其稚子也·皆亡矣·蓋群鬼滿室·左右盡悚·俄開目變貌·作田氏音聲·顧張曰·知縣其為姑來·姑生前有欲言者·今當具以告·邀使稍前·歷道始死時·夫兄侵牟及婢妾竊攘事·主名物色·的的不差·且囑立所養次子為劉氏後·復切切屏語·似不欲他人預聞·良久灑淚曰·我無大罪惡·不墮地獄道中·但受生有程·未能便超脫耳·嗚咽而去·方附著時·廖氏眼頰笑渦·及十指纖長·全如田姑在生容貌·如是繼日來·訖於廖歸·明年春·將祔於劉塋·張與廖送葬·宿其塚次·方寒雨淒零·松風答響·皆起怖悸意·廖復為所憑·張譙之曰·必山鬼野怪假托·若真田三姑·何為容色不與去冬等·隨聲而變·宛然不少異·申言曩事·叮嚀委曲然後已·迨廖氏還家·又來倩有禱於張·旁人曰·張知縣居不遠·盍徑往白之·曰·宅龍遮我·雖欲入不見容·我不免為是·後一年·廖卒始絕·鬼附生人多矣·獨能使形狀如之·為可怪也·

汪澄憑語

番陽人汪澄·家頗富·獨好以漁弋掛罟為樂·年財三十·以幹道九年五月死·其妻裡中餘氏女也·稍取其敖戲之具與人·或毀棄之·明年七月旦初夜·妻在床未睡·覺四體竦浙·驚喘呼告其乳媪·媪亦然·俄頃作澄語·罵其妻曰·賤人來·吾死能幾時·汝已萌改適他人意·二子皆十許歲·家貲殊不薄·豈不能守以終喪·吾甚愛鸚鵡雕籠·及雙角弓·何得便與三十五舅·三十五舅者·妻之兄仲滔也·所居正比鄰·密覘壁間·澄厲聲曰·何不入視我·而顧竊聽·滔懼即捨去·又使招其仲兄·辭以疾·則歎息曰·生時不相睦·固知其不肯來·吾父可得見否·父老且病·扶杖哭而入·澄拱手而揖·為恭敬聽命之狀·父曰·兒既不幸早世·得不墮惡趣·寬吾悲心·無為見怪於家·怖妻子也·澄亦泣曰·大人有言·澄當去·媪遂厥然而默如·兩食頃·復附語呼其子曰·我將出而土地見阻·汝宜辦小祭·善為我辭·子遽殺雞取酒·詣祠禱解·媪乃蘇·□氏□客□時說·

聶進食厭物

北京人聶進·家世奉道·不茹犬雁鱉蒜之屬·唯進獨喜食·父常戒之·輒曰·將止矣·他日·又如初·年二十二歲時·病傷寒困頓·見青衣人來喚·遂隨以行·逾山涉水·乃抵大城門·門吏問此何人·青衣曰·聶進也·吏曰·來矣·可速行·已而到一宮闕·門下復有吏·衣裾甚偉·亦抗聲問曰·何人·青衣復曰·聶進也·吏亦曰·來矣·官人相候久·可速入·進殊驚悸·引立廡下·或呼令升階·進密舉首·見三人皆王者服·據案坐·諭進曰·汝嗜食厭物·雖父兄戒飭·不敬聽·是何理耶·此等物亦有何好·進伏地告曰·茲蒙嚴旨·自此決當斷食·王曰·果能爾·當放還·進曰·苟復念此·罪死不赦·王命吏送歸·冥行不知所之·及家·望孥累累泣·吏推之·身投榻上·血污從鼻出·約兩門許·移時漸蘇·進後由北方歸·正得官·淳熙元年·年四十九矣·為秉義郎添監撫州酒稅·自言其事·

新廣祐王

邵武軍北大乾山廣祐王廟·考圖記乃唐末歐陽使君之神·距縣二十里·對路立屋數楹·以館祠客·有王道人者·居其旁·躬灑掃事·頗謹樸曠直·幹道四年秋·夢車騎滿野·羽儀輿蓋·如迎方伯連率·而又過之·皆自廟中出·趨問何所往·一吏曰·遠接新廣祐王·曰·敢問王何人·今居何地·曰·在浦城縣·故臨江丞陳公也·覺而記其語·明日·徑走其處詢訪之·果有陳丞以進士登第·平生廉正·為鄉里所稱·死方五日·道人驗夢可信·喜而歸·稍以告人·今猶處祠側·

詹小哥

撫州南門黃柏路居民詹六·詹七·以接鬻縑帛為生·其季曰小哥·嘗賭博負錢·畏兄極責·徑竄逸他處·久而不反·母思之益切·而夢寐占卜皆不祥·直以為死矣·會中元孟蘭盆齋·前一夕·詹氏羅紙錢以待享·薄暮·若有幽歎於外者·母曰·小哥真亡矣·今來告我·取一鈔錢·祝曰·果為吾兒·能掣此錢出·則信可驗·當求冥助於汝·少焉陰風肅肅·類人探而出之·母兄失聲哭·亟呼僧誦經拔度·無復望其歸·後數月·忽從外來·伯兄曰·鬼也·取刀將逐之·仲遽抱止曰·未可·稍前諦視·問其死生·弟曰·本懼杖而竄·故詣宜黃受傭·未嘗死也·乃知前事為鬼所詐雲·

晁端揆

晁端揆居京師·悅裡中少婦·流眇寄情·未能諧偶·婦忽乘夜來·挽衣求共被·晁大喜·未明索去·留之不可·曰·如是得無畏家人知乎·既去·蓐褥間餘血洩跡·亦莫知所以然·越三日過其間·聞哭聲·扣鄰人曰·少婦因產而死·今三日矣·晁掩涕而歸·

水上婦人

政和間·京西路提點刑獄周君·失其名·以威風·直震郡縣·嘗乘舟按部還·遙見水上若婦人長尺餘·衣袂蹁躚·迎舟而下·泊相近·容色悽慘·類有所愆·及相去咫尺·迷不知所在·疑為偶然也·次日·所見復如之·其色益悲·周謂必冤魂伸吐·遂停桌·即近縣追一倡·須語言稍警惠者·眾莫測何為·既至·衣冠焚香祝之·曰·汝果抱冤·當憑此倡以言·吾為汝直·須與倡凜凜改容·哀且泣·音聲如他州人·雲·妾某州某縣某氏·為某人謀財見殺·事不聞於官·無由自白·敢以遺恨告·周隨錄其語·密檄下彼郡·捕得凶民·一問具伏·遂置諸法·周表卿尚書為宜黃丞時·為疏山長老了如說而忘其名·或云即茂振樞密麟之父也·

張圭復生

江吳之俗·指傷寒疾為疫癘·病者氣才絕·即斂而寄諸四郊·不敢時刻留·臨川民張圭死·置柩於城西廣澤庵·庵僧了燾·夜聞撲索有聲·起而伺則張柩中也·既不敢發視之·隔城數里·無由得言·但拱手而已·良久聲息·遲明奔告其家·亦不問·至秋將火葬·剖柩見屍·乃臥臥掩面·衣服盡碎裂·蓋曩夕復甦而不獲伸也·吁可傷哉·番陽亦有小民·以六月拜岳帝祠·觸熱悶絕·亟棺厝於普通塔·其事正同·

張客奇遇

餘乾鄉民張客·因行販入邑·寓旅舍·夢婦人鮮衣華飾·求薦寢·迨夢覺·宛然在旁·到明始辭去·次夕方闔戶·燈猶未滅·又立於前·復共臥·自述所從來·曰·我鄰家子也·無多言·經旬日·張意頗忽忽·主人疑焉·告曰·此地昔有縊死者·得非為所惑否·張秘不肯言·須其來·具以問之·略無羞諱色·曰·是也·張與之狎·弗畏懼·委曲扣其實·曰·我故倡女·與客楊生素厚·楊取我貲貨二百千·約以禮昏我·而三年不如盟·我悒悒成瘵疾·求生不能·家人漸見厭·不勝憤·投繯而死·家持所居售人·今為邸店·此室實吾故棲·尚眷戀不忍舍·楊客與爾同鄉人·亦識之否·張曰·識之·聞移饒州市門·娶妻開邸·生事絕如意·婦人嗟喟良久·曰·我當以始終托子·憶埋白金五十兩於床下·人莫之知·可取以助費·張發地得金·如言不誣·婦人自是正晝亦出·他日低語曰·久留此無益·幸能挈我歸乎·張曰·諾·令書一牌曰·廿二娘位·緘於篋·遇所至·啟緘微呼·便出相見·張悉從之·結束告去·邸人謂張鬼氣已深·必殞於道路·張殊不以為疑·日日經行·無不共處·既到家·徐於壁間開位牌·妻謂其所事神·方瞻仰次·婦人遂出·妻詰夫曰·彼何人斯·勿盜良家子累我·張盡以實對·妻貪所得·亦不問·同室凡五日·又求往州中督債·張許之·達城南正度江·婦人出曰·甚愧謝爾·柰相從不久何·張泣下·莫曉所云·入城門亦如常·及就店·呼之再三·不可見·乃亟訪楊客居·則荒擾殊甚·鄰人曰·楊元無疾·適七竅流血而死·張駭怖遽歸·竟無復遇·臨川吳彥周舊就館於張鄉里·能談其異·但未暇質究也·

吳二孝感

臨川水東小民吳二·事五通神甚靈·凡財貨之出入虧贏·必先陰告·忽來見夢曰·汝明日午時當為雷擊死·二乞救護·神曰·此受命於天·不可免也·吳雖下俚人·而養母至孝·凌晨具饌以進·白雲將他適·請暫詣姊家·母不許·俄黑雲起·日中天地冥暗·雷聲填然·吳益慮驚母·趣使閉戶·自出坐野田·以待其罰·頃之·雲氣廓開·吳倖免禍·亟歸拊其母·猶疑神言不必實·未敢以告·是夜復夢曰·汝至孝感天·已有宿惡·宜加敬事也·母子至今如初·

杜默謁項王

和州士人杜默·累歲不成名·性英儻不羈·因過烏江·入謁項王廟·時正被酒沾醉·才炷香拜訖·徑升偶坐據神頸拊其首而慟·大聲語曰·大王有相虧者·英雄如大王·而不能得天下·文章如杜默·而進取不得官·好虧我·語畢·又慟·淚如雨·廟祝畏其必獲罪·強扶掖下·掖之出·猶回首長歎·不能自釋·祝秉燭入·檢視神像·亦垂淚尚未已·

龜鶴小石